

Miscellanea

De erectione statuæ S. Norberti in basilica S. Petri vaticana.

Historia erectionis statuæ S. Norberti in alma basilica vaticana bis in *Analectis praem.* tractatur, olim à Rmo H. Lamy, altera vice, anno elapso, à R.D. J.-B. Valvekens ¹⁾).

Ex Archiviis secretis vaticanis, epistolam Petri Antonii Parchappe de Vinay, abbatis generalis neo-electi ²⁾ ad papam Clementem XIII extrahimus. Abbas Parchappe de Vinay, decisiones capituli generalis anni 1738 in memoriam habens, a domino papa postulat moram aliquam ³⁾ : status abbatiarum pessimus et calamitates belli ⁴⁾, impedimenta tulerunt maxima.

Rue de l'Université, 12
75007 - Paris

X. LAVAGNE D'ORTIGUE.

Epistola abbatis generalis P. A. Parchappe de Vinay ad papam Clementem XIII missa.

« Beatissime Pater,

Lugendum Benedicti decimi quarti pontificis maximi cum dolerem fatum, amarisque facies suffunderetur lacrymis, quod angularem Ecclesiae lapidem rapuisset pallida mors; acerbum meum leniit dolorem Sanctitatis vestrae ad ecclesiae clavum accessionis faustum nuncium. Festivas aggratulationes meas ad pedes Sanctitatis vestrae provolutus offerre audeo, universo orbi catholico sincere congratulans quod claves Ecclesiae pontifici credantur tam eximia conspicuo

¹⁾ H. LAMY, *L'érection de la statue de saint Norbert dans la basilique Saint Pierre à Rome*, in *Analectis praem.*, XVI, 1940, pp. 109-144. — J.-B. VALVEKENS, *De erectione statuæ S. Patris Norberti in basilica S. Petri Vaticana*, in *Analectis praem.*, XLVII, 1971, pp. 232-243.

²⁾ Post mortem Brunonis Becourt, die 21a decembris 1757, P. A. Parchappe de Vinay in abbatem generalem canonici abbatiæ capitis ordinis elegerunt.

³⁾ Cf. J.-B. VALVEKENS, *op. cit.*, pp. 238-239.

⁴⁾ Gallicè : guerre de Sept ans.

pietate, tanta perillustri doctrina, omnique ornato virtutum genere.

« Animum meum interea acutus excruciat dolor. Ordinem nostrum perenne mox manet opprobrium, hujus declinandi omnis mihi praeclusa via. Decrevit sacra Congregatio Reverendae fabricae, ut S. P. Norberti statuae modulus e basilica S. Petri propelleretur, nisi intra annum marmorea erigeretur statua. Hujusce operis perfectionem totis anhelis praecordiis, huicque sedulam libenter admovebo manum, ast nunc omne vanum conamen molimenque cassum; siquidem dira nos undique premit egestas totumque grassatur per ordinem. Nec mirum, ecclesiarum nostrarum facultates ab ovo tenues admodum, ex die exiles magis evadunt; inter eas plures, ne dicam fere omnes, deprimunt commendae; plurimum depressit et ipsarum omnium matrem trium paucis ab hinc annis generalium immaturus interitus. Regiones nostras ad haec vel vicinas cruentus continuo vastat Martis gladius; exactionesque tantae, ut, iis solutis, religiosus victus et vestitus vix erogari possint.

« Clementiam vestram, Beatissime Pater, super tam gravi negotio prostratus appellat candidus ordo, majoresque supplex rogat inducias, has concedere si non dedignetur Sublimitas Vestra, sumptibus statuae conficiendae sufficientibus, quam potero celerrime cumulandis totus incumbam, qui maneo,
demississima veneratione
Sanctitatis Vestrae

submississimus et humillimus servus
et in Christo filius de Vinay electus
abbas Praem. et generalis ».

Praemonstrati,
19a julii [1758] »

(Archivium secretum vaticanum, *Particolari* 236, ff. 3-3 v^o).

**De electione Abbatum Generalium
Augustini de Roquevert (1740),
Brunonis de Bécourt (1741),
Antonii Parchappe de Vinay (1758).**

Electiones Abbatum in variis regionibus in genere, et abbatis Praemonstratensis, insimul abbatis generalis totius Ordinis in specie,